

लैफ्टिनेंट गवर्नर मनोज सिन्हा होंरें कल लोकभवन च बरे 2026 लेई जम्मू-कश्मीर बैंक दे कंदे पर टंग्गने आले ते टेबलें पर रक्खे जाने आहले दौने किस्मै दे कलेंडर जारी कीते। कंधें आले कलेंडरें च जित्थे जम्मू-कश्मीर ते लद्दाख दे दरेयाएं गी दर्शाया गेदा ऐ उत्थै गै टेबल आले कलेंडरें च दौने प्रदेशें दिये ऐतिहासिक थाहरें गी प्रदर्शित कीता गेदा ऐ। इनें विशें दी सराहना करदे होई एल.जी होंरें दरेयाएं-पर्यावरण तंत्र ते विरासती थाहरें दे संरक्षण लेई सामुदायिक स्तर पर जतनें दी जरूरतें पर जोर पाया। उनें आखेया जे जम्मू-कश्मीर दे दरेया नां छड़ा ताजे पानी दा स्रोत न सगुआं ओह खाद्य सुरक्षा ते जैविक बन्न-सबन्नता दा संरक्षण बी जकीकी बना करदे न। श्री सिन्हा होंरें आखेया जे इनें बेशकीमती खजाने दी हिफाजत लेई पूरे समाज गी किट्ठे रलियै कम्म करना लोड़चदा ऐ।

जंगलात ते जल शक्ति मंत्री जावेद अहमद राणा होरें जम्मू नार्थ च पानी सप्लाई स्कीमें दी रफ्तार दा जायजा लैता। मीटिंग च होरनें दे इलावा MLA शाम लाल शर्मा ते दुए सीनियर अफसर मौजूद हे। मीटिंग च ढांचागत चुनौतियें कन्ने निबड़ने- खराब पेदे ट्यूबवैलें गी फही ब्हाल करने ते चला रदियें परियोजनाएं दे निर्माण कम्में दी रफ्तार

बधाने पर चर्चा कीती गई। राणा होरें जंगली जियां जैतुएं आहले विभाग कन्नै तालमेल रखने पर बी जोर पाया तां जे संरक्षित थाहरें पर पाईपां बछाने आहला कम्म ते निर्माण गतिविधियां बिजन कुसै रुकावट दे बगैर चिर लाए दे तोड़ चाढ़ियां जाई सकन।

<><><><><><>

Winter Carnival

स्यालै आहला उत्सव “विंटर कार्निवल” बड़ी नियालप मगरा कल सनासर च रम्भ होआ। पूरे भारत थमां आए दे सैलानियें ते स्थानीय बसनीकें- प्रांतै दे कुदरती शलैपे ते सांस्कृतिक विरसे गी किट्ठे रलियै समारोह रुपै च मनाया। इस मौके गीत-संगीत- रोमांचकारी गतिविधियें जियां सनासर झीलै च शिकारा द्रौड़ ते घोड़ें दी रैली नै सैलानियें गी होर रोमांचित कीता ते उनें गी इक यादगार उत्सव आहला तजुर्बा दिता। एहदे इलावा पत्नीटॉप च बी लोकप्रिय पंजाबी गायक निन्जा आसेया अज्ज इक बशेश प्रोग्राम राहें संगीत ते स्यालै दा जोश पत्नीटॉप च जीवंत रंग बना रदा ऐ।

<><><><><><>

Security Arrangements

नमें बरे दे जश्न कोला पैहले खरी मती गिनतरी च सैलानी ते मकामी लोक बी मशहूर सैलानी थाहरें -पत्नीटॉप ते सन्नासर पुज्जी गेदे न ते एहदे मददेनजर जम्मू-कश्मीर पुलसै पूरे खिते ते खासकरी सैलानी थाहरें पर सुरक्षा बधाई दिती ऐ। पुलस आसेया बक्ख-बक्ख थाहरें पर बैरीकेड लाइयै जम्मू-श्रीनगर राश्ट्री जरनैली सिड़क पर गड़ियें दी जांच कीती जा

रदी ऐ- तां जे नमें बरे दा जश्न- सुरक्षित ढंगे नै तोढ़ चढ़ी सकै। उधमपुर दे DSP हैडक्वार्टर प्रहलाद कुमार होरें दस्सेया ऐ जे फौज- CRPF- ITBP ते जिला पुलिस आपसी तालमेल कन्नै सुरक्षा जकीनी बना करदे न। सैलानी थाहेरं पर औने आहलें गी गुज़ारश कीती गई ऐ जे ओह नशीले पदार्थें दा सेवन नैई करन ते कुसै बी चाल्ली माहौल खराब नैई करदे होई पूरी जिम्मेदारी कन्नै नमें बरे दा जश्न मनान। तौआई नमें बरे शा पैहले कटड़ा- माता वैष्णो देवी मार्ग पर बी सुरक्षा बवस्था गी तगड़ा करी दिती गई ऐ। श्रद्धालुएं ते सैलानियें दी सुरक्षित ते बवस्थित आओ-जाई लेई बादद् बलें दी तैनाती कीती गई ऐ।

<><><><><><>

New End Reforms

भारत नै बरे 2025 च इक नेह सांस्कृतिक जोश कन्नै कदम रक्खेया हा जेहड़ा जोश पिच्छले इक दहाके थमां बना करदा हा। भारत नै जिस भसाह-बरोसे कन्नै इस बरे अपनी सांस्कृतिक पंछान गी इक नमें सिरेया स्थापत कीता- उन्नै पूरी दुनिया गी हरान करियें रक्खी दिता। 2025 ओह बरा बनी गया जिन्ने भारत दियें प्राचीन परम्पराएं गी पूरी दुनिया च इक नमीं पंछान दोआई ते इस बरे भारत दी संस्कृति-स्थाड़ी राश्ट्री पंछान दे केन्द्र च आई गई। इस बरे प्रयागराज च आयोजित भव्य महाकुंभ च 66 करोड़ शरदालुएं आस्था दी चलोबी लाई ते एह महाकुम्भ मनुक्खी इतिहास दा सब्बनैं शा बड़ा आध्यात्मिक किट्ठ बनी गया। इस बरे अयोध्या च श्री राम मंदरै पर धर्म ध्वज दी स्थापना इक ऐतिहासिक आध्यात्मिक मील दा पत्थर साबत होई। एदे इलावा इस्सै बरे त्रिपुरा सुंदरी जनेही प्राचीन धार्मिक थाहरें च बी नमें सिरेया जान भरी गई। भारत नै इस

बरे राजेन्द्र चोल-I हुंदी समुन्दरी विरासत- “वंदे मातरम” गीत दे 150 बरे ते अहिल्या बाई होल्कर हुंदी 300मीं जयंति दा जशन बी मनाया। इस बरे देयाली ते मराठा फौजी कौशल गी यूनेस्को दी मानता हासल होने ते भगवाव बुद्ध हुंदे अवशेषें गी वापस भारत आहन्नेया जाना पूरी दुनिया गी भारत दे बधदे सांस्कृतिक विश्वास कन्नै अवगत करोआंदा ऐ।

<><><><><><>

Weather

उत्तरी-कश्मीर च पच्छमी ब्हाई च खौदल आली कमजोर स्थिति दे मददेनजर उत्तरी कश्मीर दे हिस्सें च हौली बरखा ते बर्फबारी होई ऐ। गुलमर्ग-साधना टॉप ते तुलैल घाटी जनेही उच्चियें थाहरें पर ताजा बर्फबारी ते होरनें इलाकें च बदल घनोने दी खबर ऐ। मौसम विभाग नै औंदी 10 जनवरी तोड़ी खिते च बदल छाए दे रौहने ते केंई सारी थाहरें पर रुकी-रुकियै बरखा बरने जां बर्फबारी होने दी पेशगोई कीती ऐ। तोंआई जम्मू च कल घट्टो-घट्ट तापमान 8 इशारिया 6 डिग्री सैलसियस- कटड़ा च 9 इशाहिया 8 डिग्री-भद्रवाह च 3 इशारिया 8 डिग्री ते किश्तवाड़ च मनफी 1 इशारिया 5 डिग्री सैलसियस दर्ज कीता गया। प्रशासन नै लोकें गी सलाह दिती ऐ जे ओह मती ऊंचाई आले इलाकें च बर्फबारी ते पदरे इलाकें च घनी धुंध दे मददेनजर पूरी एहतियात दे कन्नै गड्डी चलान तांजे सिड़क हादसें कोला बचेया जाई सकै।

<><><><><><>